

## Vatnsendi <sup>(1)</sup>

Sá bær er nokkuð inn frá Héðinsfirði, austan suðurenda hins mikla stöðuvatns, sem næst gengur inn frá fjarðarbotni og hefir af því nafn fengið. Byggðarstæði er hér allgott einkum þar sem bærinn hefir fyrst staðið, en hætta mikil af snjóflóðum. Hafa og formenn ekki hér bústað valið og byggð engin verið á fyrri öldum; eru girðingar hér engar fornar, né annað er til þess bendir. Mun býli þetta hafa reist verið á löndum hins forna býlis: Grundar sem hér hefir verið nokkuð innar, en mjög lengi í auðn. Má ætla að hér hafi fyrst byggt verið á 16. öld eða snemma á hinni 17. og haldist þá til aldarloka og þó í auðn færi þá um sinn og aftur í Stórubólu 1707 var hér enn búið nokkru síðar uns bærinn eyddist í snjóflóði vorið 1725. Létust þar þá 4 menn, eða 5, en 2 lifðu. Var hér svo óbyggt til 1777 en þá að nýju bær reistur á öðrum hávaða nær yst í túni. Er sagt að þar hafi snjóflóð einnig tekið suðurenda baðstofu og sjáist þess enn merki. Hér stóð þó bærinn til 1935 að hann var reistur við vatnið út og niður frá túni og byggð hefir hér haldist, utan fá ár, allt frá 1777 til þessa. Tún er hér nokkuð og túnefni allgott, engi góð og haglönd einnig; hefir þó hvorttveggja meira verið, því lengi hafði býli þetta Grundarlönd nær öll uns þar var aftur byggt og lönd einnig mikil vestan ár, er síðar hafa undan gengið en nokkuð hafa lönd þess aftur aukist að utan.

Forn örnefni mun hér vart að finna, en nokkur eru kennd við byggð þessa. Nefnist hér dalhvolf allmikið upp í fjalli, nær beint upp frá bæ: *Vatnsendaskál* (2). Fjallstindur hár norðan hennar: *Ytri-Vatnsenda-hnjúkur* (3) en sunnan hennar *Syðri-Vatnsendahnjúkur* (4). Suður og upp frá bæ nær miðhlíðis eru: *Vatnsendabrúnir* (5) en hið neðra, allt inn frá horni vatnsins að suðurmerkjum: *Vatnsendamýrar* (6) er það engjaland mikið, flatt og grösugt. Þá nefnast holt nokkur samliggjandi, austan vatnsins, út frá bæ: *Vatnsendaholt* (7) og grund allstór við vatnið út og niður frá túni *Vatnsendaeyri* (8). Stendur þar nú hinn nýi bær. Í túninu eru þrjár hólur sem hæst ber, tveir með tóftum hinna föllnu bæja, hinn þriðji með fjárhústóftum; nefndir: *Ytri-Bæjarhóll* (9) *Syðri-Bæjarhóll* (10) og syðstur: *Fjárhúshóll* (11).

Ofan úr Vatsendaskál falla lækir tveir, annar skammt út frá túni, nefndur: *Stórilækur* (12) hinn gegnum tún, milli Bæjarhólanna, nefndur: *Bæjarlækur* (13) skiptist hann upp frá túni í tvær kvíslar, er sameinast neðan Bæjarhólanna, nefnist hólmi þessi: *Kvíatunga* (14). Með framburði hafa lækir þessir báðir, myndað grundir nokkrar, niður við og fram í vatnið, er fram frá Bæjarlæk: *Bæjareyri* (15) en Stóralæk: *Vatnsendaeyri*, áður nefnd. Sunnan Stóralækjar út frá túni, er: *Bæjarholt* (16) en norðan hans upp í hlíðarhallanum *Stóralækjarbreið* (17). Skammt upp frá túni milli lækjanna er: *Ytraholt* (18) og lítið ofar suður við Bæjarlæk: *Syðraholt* (19). Sunnan

Bæjarlækjar einnig skammt upp frá túni er jarðhitasvæði nokkurt, nefnt: *Laugar* (20) og neðarlega á því allstór hóll, nefndur *Laugahóll* (21). Laugar eru hér þó engar. Sunnan Laugahóls og Fjárhúshóls, gengur hallandi breið milli lækjardraga tveggja, allt ofan að horni vatnsins; stendur þar við vatnið bjarg mikið einstakt og einkennilegt að lit, nefnt: *Grásteinn* (22) nefnist og breið þessi *Grásteinsspilda* (23) og norðan hennar *Grásteinslækur* (24). Er öll þessi spilda hið besta túnefni hér, sjálfgert, en hvorki ræktuð né nytjuð, sakir ótta við hefndir huldra vætta. Ofan til á breið þessari er og annað einstakt bjarg, nefnt: *Stóristeinn* (25). Í klettum þessum, einkum þeim efri hefir fullvíst talist að huldufólk ætti bú. Næst inn frá Grásteinsspildu og henni samhliða er: *Stekkjarspilda* (26) einnig grösug og í henni stekkjartóft; nefnist utan hennar *Stekkjargil* (27) en innan *Stekkjarlækur* (28). Nokkuð sunnar fellur annar meiri lækur, kemur hann yst fram úr skálum þeim er síðar getur, ofarlega í fjalli, um gil það er nefnist: *Klettagil* (29) og hann því *Klettagilslækur* (30). Utan hans þar hann fellur niður á Vatnsendamýrar er skriðugrund slétt og gróin nefnd *Stekkjargrund* (31) virðist þar heygarðstóft gömul og stekkjartóft lítil ofan á henni.

Næst inn frá vatninu vestur að ánni gengur: *Bæjarnes* (32). Norðan þess er: *Bæjarsíki* (33) og þar innst í vatninu *Bæjarneshólmi* (34) en *Sandhólmi* (35) skammt utar, nokkuð stærri, beint vestur frá Grásteini. Suðvestur frá enda Bæjarness er: *Bæjarneshylur* (36) en norðvestur: *Bæjarnesvað* (37) og yst út við vatnið: *Ystavað* (38). Suður frá Bæjarnesi er *Víðirnes* (39) einnig slétt og fagurt engi; norðan þess er *Víðirnessíki* (40) vestur frá nesinu: *Víðirnestangi* (41) og sunnan hanns: *Víðirneshylur* (42). Austan nesja þessara eru Vatnsendamýrar áðurnefndar, einnig mikið samliggjandi engi. Í þeim fremur innantil eru tveir einstakir hólar; nefnist hinn syðri: *Strýtuholt* (43) hinn ytri: *Einstakaholt* (44) rétt norðan við það er: *Djúpatjörn* (45). Nálægt vatninu nokkuð út frá bæ eru stekkjartóftir, nefndar: *Gamlistekkur* (46) þar fellur og lækur, nefndur: *Stekkjarlækur* (47). Út að læk þessum ná Vatnsendaholt sem áður getur; enda sögð þar hafa verið takmörk Vatnsendalanda fram á síðustu öld, þótt nú séu allmikið utar og teldust enn utar um sinn.

Skammt út frá Stekkjarlæk er steinn einn við vatnið, ekki stór, nefndur: *Gægir* (48) og innan við hann lítil vík: *Gægisvík* (49). Þar út frá eru og þrjár grjóteyrar litlar fram í vatnið, nefndar: *Litlugrundir* (50). Í neðri brún Vatnsendaskálar, milli lækjanna sem getið var, eru hæðarstallar tveir, skiptir gildrag þeim báðum í tvennt svo melhöfðar verða er nefnast: *Neðrihausar* (51) og *Efrihausar* (52) hin efri brúin, en gildragið: *Hausagil* (53). Inn frá Hausunum, sunnan Bæjarlækjar, eru Vatnsendabrunir áðurnefndar, sem framhald af hæðastöllum þessum. Nefnist háhlíðin upp frá þeim, sunnan skálar *Vængur* (54). Út frá Hausunum, norðan Stóralækjar, er og framhald af hæðabrunum og næst utan lækjar melbunga allmikil nefnd *Rauðafell* (55) og lítið eitt utar og ofar önnur lág melbunga nefnd: *Efstafell* (56). Liggur það út að hnjúk þeim

allháum sem þar er yst og vestastur á milli Vatnsendaskálar og Steinnesskálar að utan sem getið mun. Niður frá Rauðafelli er og hæðastallur vel grösugur, nefndur: Grænafell (57). Upp um Vatsendaskál er gangleið fær og kunn til Ólafsfjarðar, er austan hennar farið yfir háfjallið um skarð eitt lítið, nefnt: Afglapaskarð (58). Er upp frá Hausunum áðurnefndu farið um melhrygg, er alllangt nær austur í skálina, nefnist hann Kattarhryggur (59) og neðst á honum stór steinn: Kattarsteinn (60) er sú orsök nafnanna að bræður tveir ungir fylgdu móður sinni upp á fjall á leið til Ólafsfjarðar, en köttur kom óvænt eftir þeim. Gjörðu þeir honum þá byrgi við steininn og geymdu þar uns þeir komu aftur.

## Stafrófsröð örnefna Vatnsendi

- A -	- H -	- V -
Afglapaskarð 58	Hausagil 53	Vatnsendabrúnir 5
- B -	- K -	Vatnsendaeyri 8
Bæjareyri 15	Kattarhryggur 59	Vatnsendaholt 7
Bæjarholt 16	Kattarsteinn 60	Vatnsendamýrar 6
Bæjarlækur 13	Klettagil 29	Vatnsendaskál 2
Bæjarnes 32	Klettagilslækur 30	Vatnsendi 1
Bæjarneshólmi 34	Kvíatunga 14	Víðirnes 39
Bæjarneshylur 36	- L -	Víðirneshylur 42
Bæjarnesvað 37	Laugahóll 21	Víðirnessíki 40
Bæjarsíki 33	Laugar 20	Víðirnestangi 41
- D -	Litlugrundir 178	Vængur 182
Djúpatjörn 45	- N -	- Y -
- E -	Neðrihausar 51	Ystavað 38
Efrihausar 52	- R -	Ytraholt 17
Efstafell 56	Rauðafell 183	Ytri-Bæjarhóll 9
Einstakaholt 44	- S -	Ytri-Vatnsendahnjúkur 3
- F -	Sandhólmi 35	
Fjárhúshóll 11	Stekkjargil 27	
- G -	Stekkjargrund 31	
Gamlistekkur 46	Stekkjarlækur 28	
Grásteinn 22	Stekkjarlækur 47	
Grásteinslækur 24	Stekkjarspilda 26	
Grásteinsspilda 23	Stóralækjarbreið 145	
Grænafell 57	Stórilækur 12	
Gægir 48	Stóristeinn 25	
Gægisvík 49	Strýtuholt 43	
	Syðraholt 18	
	Syðri-Bæjarhóll 10	
	Syðri-Vatnsendahnjúkur 4	